

# Razzissem en ils Stadis Unids

## Il pajais da Donald Trump

DA GUIU SOBIELA-CAANITZ

■ **En gnanc in mais elegia il pievel dals Stadis Unids (passa 320 milliuns olmas) il chau dal pajais per quatter onns. Segir: Quai na resguarda betg nus sco burgaisas e burgais da la Svizra; lezza n'è gnanca limitrofa dals Stadis Unids.** Ma 12,4% da noss exports van là, e quel pajais dominescha in'alianza defensiva che cumpiglia era noss trais gronds stadis vischins. Il dollar è anc adina la valuta principala dal mund, e l'anglais american ses linguatg principal. Da Bumaun survegn la superpusanza in nov chau dal stadi. Quel dals davos otg onns, Barack Hussein Obama, è stà l'emprim president nair en l'istorgia dal pajais: Ses bab derivava da l'Africa da l'ost, e Barack era gia stà l'unic senatur nair, decennis suenter l'emprim president catolic (John Fitzgerald Kennedy, 1917–1963). Blera gliעד ha salidà l'elecziun d'Obama 1908 sco l'entschatta d'in temp nov, in temp senza razzissem. Segir: Ins aveva mazzà Kennedy, ma ins n'ha per cletg betg mazzà Obama. Però uss as palenta adina dapli en il pajais ch'il razzissem viva anc adina, anzi, ch'el mazzà ad in mazzar e che sias unfrendas n'èn betg mo nairas, mabain er immigradas da lingua spagnola. Il cumbat electoral sa splega en in clima da profund malesser social, tant pli che la politica aggressiva da la Russia augmenta la tensiun internaziunala. Il schurnalst franzos Michel Floquet, correspondent da TFI ed LCI a Washington da 2011 a 2016, ha gist publictà in essai fitg critic davart ils Stadis Unids (1). I suonda in commentari dals chapitels 8 e 15.

### Policists alvs cunter umans nairs senz'armas

«A Los Angeles il 1992 (...) han sis dis da violenza e sblundregiada fatg 53 unfrendas e passa 2000 blessads (...) suenter l'absoluziun scandalusa da policists

alvs ch'avevan pitgà ensemen in um nair» (p. 125). Ma l'unda actuala da murdraretschs da nairs commess da policists alvs ha entschavì ils 9 d'avust 2015 a Ferguson (Missouri). «Brown (18) era senz'armas. Policist Wilson ha sajettà dudesch giadas. Ins ha lura sistì l'inquisiziun (...). Durant ils tumults han ins dà fiu a duas u trais butias ed insaquants autos. Quai ha chaschunà temas existenzialas. Uschia ha entschavì ina seria d'abus polizials, (...) adina cun in policist alv ed in'unfrenda naira» (pp. 124–125). L'autur rapporta da plis cas, t. a. quest: «In Cleveland [en l'Ohio] è in pèr senz'armas che n'era betg sa fermà tar ina controlla stradala mort en ses autos cun 138 (!) ballas; las davosas 15 aveva in policist, muntà sin il viertgel dal motor, tratg tras il paravent. Ins pudess dar ina lunga glista; bunamain mintga giada manegiava la giustia suenter ch'ins na duaja betg proceder legalmain (...). 2015 a Baltimore [en il Maryland] è in tumult bunamain rut ora cur che la polizia ha assassinà in giuven nair. Lura ha il pajais chapì ch'i na sa tractia betg d'ina simpla novitad, (...) mabain d'in sistem (...). Las medias han chattà ora ch'ins haja purtà plant 317 giadas cunter la citad da Baltimore, da 2011 a 2014, pervi da violenzas, arrestaziuns e detenziuns illegalas. Para 100 da quels plants han manà a sentenziar la citad: Aifer quatter onns ha'l stuì pajar passa 5,7 milliuns \$ indemnaziun (...). Dapi 1993 ha Chicago pajà 85 milliuns \$ a las unfrendas da sia polizia (...). Il president da la citad è sa perstgisà en tutta furma tar la populaziun dal ghetto nair da Chicago» (pp. 125–129).

### Ina minoritad che crescha

«La populaziun da 'Latinos' (...) è oz la segunda unfrenda da violenzas polizialas (...). I sa tracta dals 'Latinos' uffizials; tiers vegnan 11–12 milliuns 'Latinos' clandestins (p. 135). A Puerto Rico èn

99,5% da la populaziun da lingua spagnola. En ils territoris suandants, parts dal México fin a 1848, èn passa 20% da la populaziun «latina»: Nov México 45%, California e Texas 38,2%, Arizona 30,2%, Nevada 27,3%, Colorado 21%. Tier vegn la Florida (23,2%). Floquet: «'Latinos' e nairs han fatg Obama. I l'han elegì adina puspè: 93% dals nairs, 75% da la gruppa da lingua spagnola. Per Obama vuscha mo ina pitschna part da la gruppa alva; el è il president da las minoritads (...). Ma lezzas vegnan plaun a plaun maioritads (...). La superpusanza sto far pasch cun sasezza. Quai para la Partida democratica d'encleger. La Partida republicana percenter (...) insista sin ina defensiun da la populaziun alva che la condemna a pli lunga vista (...). Dalonder la tensiun d'oz tranter las cumanzas» (pp. 135–136). «Segund il 'US Census Bureau' discurrevan il 2000 mo 28,1 milliuns umans spagnol a chasa; il 2014 eran els 39,2 milliuns» (2). En ses essai, publictà l'avrigl 2016, ha scrit Floquet: «Trump [il candidat republican] di savens absurditads e permala regularmain entiras gruppas socialas – las femnas, ils 'Latinos', dacurt er ils muslims (...). El ha 5,6 milliuns adherents sin Twitter, uschè blers sco Hillary Clinton (...). En questa entschatta 2016 sa decleran 40% da burgaisas e burgais 'independents'; i na sustegnan pia nagina da las duas partidas tradiziunalas» (pp. 230–231). Ussa, mez october, paran las «absurditads» da Trump surfatgas, ma Clinton na para betg da sdruagliar l'entusiassem; insaquants vegnan a vuschar per candidats alternatifs. Ils 8 da november vegn in pajais en crisa morala ad eleger probablamain sia emprima presidenta; dat quai in schlantsch nov?

1. Michel Floquet, *Triste Amérique. Le vrai visage des États-Unis. Paris (Les Arènes, ISBN 978-2-35204-500-7) 2016.*

2. Wikipedia, *Idioma español en Estados Unidos.*